

Edisi Januari - Jun 2025

MITASA



Suara

MITASA

*Adab Sebagai Asas
Kecemerlangan Akademik
dan Pembentukan Sahsiyah*

*Biar Wasiat Jadi
Suara Terakhir*

*Merungkai Potensi:
Prestasi Pekerja Dalam
Era Kerja Jarak Jauh*

*Motivasi Diri Berdasarkan
Penilaian Prestasi*

*Cabaran dan Keperluan
Graduan Teknologi
Maklumat Dalam Dunia
Pekerjaan Masa Kini*

*"Selamat Ke Kita Ni?":
Meneroka 'OSH'*

*Kursus Pengurusan Operasi
Perkhidmatan - Membentuk
Insan Adabi Cemerlang*



PERJUANGAN YANG BERTERUSAN



Biar Wasiat Jadi Suara Terakhir

Prof Madya Dr Faridah Hussain
Pensyarah Fakulti Undang-Undang

Membuat wasiat ialah salah satu langkah paling penting untuk memastikan harta pewasiat diagihkan mengikut kehendak beliau selepas beliau meninggal dunia. Ia juga memberikan arahan yang jelas kepada semua waris-waris.

Wasiat orang Islam

Rasulullah s.a.w bersabda:

"Sesiapa yang mati meninggalkan wasiat, maka dia mati di atas jalan yang lurus dan sunnah, mati di atas ketakwaan dan keimanan, serta mati dalam keadaan memperoleh keampunan (daripada Allah s.w.t)."

Diriwayatkan oleh al-imam Ibnu Majah daripada Jabir r.a.

Berdasarkan hadis di atas, jelas bahawa Islam menggalakkan umatnya membuat wasiat. Orang-orang Islam di Malaysia boleh membuat wasiat. Beberapa negeri seperti Selangor, Negeri Sembilan, Melaka, Kelantan dan Pahang telah ada Enakmen untuk undang-undang wasiat untuk orang-orang Islam. Walau bagaimanapun, negeri-negeri lain tidak ada Enakmen khas untuk wasiat bagi orang-orang Islam.

Contoh panduan menulis wasiat dapat dilihat dari Enakmen Wasiat Orang Islam (Negeri Selangor) 1999. Menurut seksyen 2 dari Enakmen ini, wasiat ertinya ikrar seseorang yang diperbuat pada masa hayatnya ke atas hartanya. Pewasiat berikrar untuk menyempurnakan sesuatu bagi maksud kebajikan atau apa-apa maksud yang dibenarkan menurut Hukum Syarak, selepas pewasiat mati.

Di bawah peruntukan seksyen 3 dari Enakmen Wasiat Orang Islam (Negeri

Selangor) 1999, sesuatu wasiat boleh dibuat dengan lisan atau tulisan. Akan tetapi, jika pewasiat itu tidak dapat melakukan sedemikian, wasiatnya boleh dibuat dengan cara isyarat yang boleh difahami.

Tatacara yang digariskan sebagai panduan membuat wasiat bagi orang Islam dapat dilihat dari hadis berikut:

Sahabat Nabi s.a.w, iaitu Saad bin Abi Waqash ada berkata;

"Wahai Rasulullah aku memiliki harta dan tidaklah ada yang mewarisinya kecuali hanya seorang anak perempuanku. Apakah aku sedekahkan dua pertiga daripada hartaku?"

Baginda berkata; "Jangan."

Aku bertanya lagi,

"Apakah aku sedekahkan setengah darinya?"

Baginda bersabda lagi,

"Jangan, sepertiga sahaja. Sepertiga itu pun sebenarnya banyak. Sesungguhnya engkau tinggalkan ahli warismu dalam keadaan kaya lebih baik daripada engkau tinggalkan mereka dalam keadaan miskin dan meminta-minta kepada orang lain."

Mengenai kedudukan pemakaian undang-undang Islam di Malaysia, adalah diputuskan bahawa undang-undang Islam bukan undang-undang asing bahkan ia adalah undang-undang negeri. Oleh itu, ia hendaklah diberi pengiktirafan kehakiman oleh mahkamah (Lihat kes Ramah binti Ta'at lwn Laton binti Malim Sultan, kes di Mahkamah Rayuan Negeri-Negeri Bersekutu Selangor, Rayuan Sivil Bil 7 Tahun 1927).

Wasiat orang bukan Islam

Akta Wasiat 1959 memperuntukkan tatacara menulis wasiat bagi orang-orang bukan Islam di Malaysia. Seksyen 5 dari Akta ini memperuntukkan bahawa wasiat hendaklah dibuat secara bertulis. Sesiapa yang mencapai umur dewasa boleh menulis wasiat. Wasiat hendaklah ditulis di hadapan dua orang saksi.

Pewasiat hendaklah mempunyai keupayaan perwasiat. Jika kesahan wasiat dicabar, beban membuktikan keupayaan perwasiat dan pelaksanaan sewajarnya terletak ke atas orang yang mengemukakan wasiat itu (Lihat kes *Eu Boon Yeap & Ors v Ewe Kean Hoe* [2008] 2 MLJ 868; *Lee Ing Chin @ Lee Teck Seng & Ors v Gan Yook Chin & Anor* [2003] 2 MLJ 97. Dapat disimpulkan bahawa wasiat tidak boleh dibuat secara tipu muslihat.

Perancangan berkesan

Pewasiat boleh mula dengan menyenaraikan semua aset, termasuk hartanah, simpanan, pelaburan, barangan peribadi, dan aset digital. Kemudian, pewasiat boleh menentukan siapa yang akan menerima aset tersebut. Individu-individu ini dikenali sebagai penerima wasiat atau benefisiari.

Pewasiat boleh memilih seorang individu yang dipercayai untuk menjadi wasi. Wasi atau pelaksana akan melaksanakan arahan dalam wasiat bagi pewasiat. Wasi mestilah seseorang yang bertanggungjawab dan sebaiknya mempunyai pengetahuan dalam hal-hal kewangan dan undang-undang.

Jika pewasiat mempunyai anak di bawah umur 18 tahun, beliau boleh menamakan penjaga yang akan menjaga mereka. Jika tidak, mahkamah mungkin akan menentukan siapa yang akan menjaganya.

Pewasiat boleh menulis wasiat sendiri. Khidmat peguam boleh juga digunakan untuk memastikan wasiat adalah sah dan lengkap. Pewasiat perlu menandatangani wasiat di hadapan sekurang-kurangnya dua orang saksi. Saksi tidak boleh menjadi benefisiari.

Wasiat bukan sekadar kertas. Ia memberi kesan perundangan. Oleh itu, dapat disimpulkan bahawa dengan membuat wasiat, pewasiat dapat menikmati ketenangan hati sebelum mati. Walaupun harta tidak boleh dibawa mati, akan tetapi wasiat boleh menjadi suara terakhir bagi pewasiat.

(Penulis juga merupakan Peguambela & Peguamcara, Mahkamah Tinggi Malaya)



THE
STARTING
POINT
OF ALL
ACHIEVEMENT
IS

DESIRE.

- Napoleon Hill